

**Uunga siunnersuut: Nalunaaquttap aalajangersarneqarnera pillugu Inatsisartut inatsisaat**

(Naalakkersuisut Siulittaasuat)

**Saqqummiussiissut**

(Naalakkersuisut Siulittaasuat)

**Siullermeerneqarnera**

Ulloq 11. maj 2022 Naalakkersuisut aamma danskit naalagaaffiat suliassa qarfiup ”Nalunaaquttap aalajangersarneqarnera” Namminersorlutik Oqartussanit tiguneqarnissaa pillugu isumaqatigiissuteqarput, takuuk ilanngussaq 1. Tigusinissamut suliassa qarfik pillugu Inatsisartut inatsisaannut siunnersuutip akuerineqarnissaa piumasaqaataavoq. Tassa imaappoq, tigusinissamut siunnersuutip matuma Inatsisartunit akuerineqarnissaa piumasaqaataavoq.

Siunnersuummi aalajangersarneqarpoq nalunaaquttamut malitassaq aammalu nalunaaquttap ingerlaqatigiiffia sorleq Kalaallit Nunaanni malinneqassanersoq. Siunnersuummi siunnersuutigineqarpoq nalunaaquttamut malitassaq tassaassasoq UTC, aammalu nalunaaquttamut nalinginnaasumut nalunaaquttap ingerlaqatigiiffia UTC -2 malinneqassasoq. Kalaallit Nunaanni ullumikkut nalunaaquttap ingerlaqatigiiffia UTC -3 malinneqarpoq.

Taamaalilluni siunnersuummi aalajangersarneqarpoq Kalaallit Nunaanni nalunaaqutaq nalinginnaasooq nalunaaquttap akunneranik ataatsimik siuartinneqassasoq. Tassa imaappoq, nalunaaqutaq ullumikkut 14.00-nngorpat, siunnersuummi siunnersuutigineqarpoq tamatumunnga taarsiullugu nalunaaqutaq 15.00-nngussasoq. Tamatuma malitsigisaanik Kalaallit Nunaata aamma Europap akornanni nalunaaquttap nikingassutaa nalunaaquttap akunneranik ataatsimik sivikillissaaq.

Amerikap avannarliup kangiata sineriaani, soorlu assersuutigalugu Iqaluit, Quebec, Toronto, Boston, New York, Washington D.C. aamma Miami, nalunaaquttap ingerlaqatigiiffiani UTC -5-imiippoq. Tassa imaappoq taakkua Kalaallit Nunaannit nalunaaquttap akunnerinik marlunnik kingulliupput, Europap kitaata sineriaa Kalaallit Nunaannit nalunaaquttap akunnerinik sisamanik siulliullutik.

Kalaallit Nunaannut nalunaaquttap ingiaqatigiiffiata nalinginnaasooq UTC -2-mut inissinneqarnerani Kalaallit Nunaat taamaalilluni nalunaaquttap ingiaqatigiiffiini Amerikap avannarliup kangiata sineriaata aammalu Europap kitaata sineriaata akornanni inissisimalissaaq. Sumiiffinni marluusuni tamaginni tamatuma kingorna nalunaaqutaq nikingassutaa nalunaaquttap akunneri pingasungussaaq.

Siunnersuut inuussutissarsiortunut, pingaartumik timmisartuussisartunut, pitsaasunik aningaasaqarnikkut sunniuteqassasoq naatsorsuutigineqarpoq. Innuttaasunut tunngatillugu immikkut atuutsitsilernissamut aalajangersakkami atuutsitsisoqalerpoq, taamaalilluni nalunaaquttap ingiaqatigiiffianut nutaamut ikaarsaarnermi annikinnerpaamik sunnerneqartussanngussallutik. Inatsisissatut siunnersuut taamaalilluni ulloq 25. marts 2023, nal. 22.00, atuutilissaaq, tassani Kalaallit Nunaat aasaanerani nalunaaquttamut aammalu nalunaaquttap ingiaqatigiiffianut UTC -2 ikaarsaartussaareemat. Kisianni nalinginnaasut akerlianik Kalaallit Nunaat 2023-mi oktobarimi arfininngorneq kingulleq ukiunerani

nalunaaquttamut/nalunaaquttamut nalinginnaasumut uteqqissanngilaq, kisianni nalunaaquttap ingiaqatigiiffiani UTC -2-miiginnassalluni.

Naalakkersuisut aamma isumaliutersuutaannut ilaasimavoq nunarput tamakkerlugu, tassa Ittoqqortoormiit ilaatillugu, nalunaaquttap ingerlaqatigiiffia assigiimmik inissinneqassanersoq. Taassumap aamma Inatsisartuni eqqartorneqarnissaa qilanaaraarput.

Taamatut oqaaseqarlunga siunnersuut Inatsisartuni kajumittumik suliassanngortippara.